

四庫全書

集部

欽定四庫全書

雪樓集卷二十九

元 程文海 撰

詩

薩迪勒默色謙齋御史瑞竹

江南御史彈琴處  
插竹為援竹自成  
不見稚叢緣節上  
渾疑隣筍過牆生  
清陰已比甘棠愛  
直氣先占衣繡榮  
回首荆臺舊亭下  
高枝應有鳳凰鳴

龍眠二馬二首

蕭蕭駿尾傍塵埃  
曾際風雲萬里開  
却憶少年河畔路  
鳴鞭落日驕騎回

迴顧飛龍玉轡頭  
還思閒卧逐犂牛  
何時放與江南好  
草軟沙平得自由

張鎮君哲清節堂

張君少也孤  
鞠育賴母慈  
母也貞且潔  
堅苦力自持  
教兒讀詩書  
不見兒貴時  
兒豈不欲養  
養已無所施  
娟娟寒梅花  
皎皎叢菊枝  
芳時苦冰霜  
未春已離披  
天地何

不仁古今同一悲  
巍巍清節堂行坐常見之  
何以報阿母勿負母所期  
聊為清節吟庶補南陔詩

吳道人息庵

厭盡人間尚愛詩  
結茅投老已嫌遲  
翛然鳥倦雲歸後  
正是風清月白時  
斫桂欲將枝并折  
畫江漸與扇相遺  
死灰槁木蒲團上  
又到身中子午期

楊唐州挽詞

子士允

天道由來遠  
楊家重可憐  
阿兄忠見嫉  
乃弟善無年  
往

事成孤憤修名竟兩全唐州千載意有子幸能傳

蘇李相別圖

漠漠陰風吹草低蕭蕭漢節對羣羝少卿心事元無異  
家共長安萬里西

淵明高卧圖

手撫高松石更奇披襟脫屣醉眠時壺中酒盡琴無軫  
說着羲皇總不知

郵城陳景新賑粟辭賞

伏波躬耕輕萬斛卜式還聞辭爵祿潁川太守復何人  
往往挾持求大欲陳君好義不言功猶落玉堂揮翰中  
見說郵城諸邑子近來相尚起廉風

衛州王景先省郎祖母八十

萱草花開宿雨乾北堂稱壽玉杯寬幾千蜀道陳情易  
八十京華就養難忠厚已從今日見艱虞莫忘昔年看  
阿婆心事諸孫福河朔聲名庶不刊

周南翁悠然軒

開軒臨四野野草細於毛白鳥湖上起青山雲外高  
援琴忘舊譜洗盞對新醪落日闌干角詩成漸逼陶

寄題郎官湖太白祠亭

黎僉事崩景高所脩

昔持黃華節觀風漢陽城城南十頃湖空有郎官名太  
白不肯顧高祠風雨傾亟召郡博士為我時經營我復  
棄官去無由觀厥成再以王事臻夙夜有期程豈無濟  
勝具對面慙高情安南古交州黎子真豪英好事竭肝  
膽摘文嚴且明連年湖上住日愛湖水清殘碑出沈翳

繚垣制縱橫象設儼遂穆飛簷鬱崢嶸蒲荷取次發行  
樹皆光晶素月濯古華澄波送新聲黃鶴怨崔顥鸚鵡  
愁禰衡歎若張李來復與岑輔并仍歌五字詩酌以白  
玉觥由來磊落士况值天下平萬古為一時四海為一  
泓神交溟渤外氣合如弟兄遂使郎官湖熒熒流芳榮  
我歸玉堂署君亦來上京示我新記文忽疑夢乍驚題  
詩謝謫仙心與孤鴻征

徐廉訪母



大梁進士邢家女嫁得徐郎在羈旅姑章但識寄來衣  
阿婦未聞堂上語姑章不待阿婦歸升堂空有淚沾衣  
可憐積善生男子不見婦歸兒貴時諸姑歸閭新無夫  
迎歸事之如舅姑有男我娶女我嫁阿姑自言今世無  
頃聞父死惟老母輦致平陽奉朝暮邢家子姪各有歸  
誰識良人心更古良人已沒諸孤長富貴聯翩照鄉黨  
門庭日廣車馬多但恨姑章隔泉壤

寄鄭信卿參政

闕下相看未忍分，過門誰料不逢君。  
竟叅華省江南去，定有新聲天上聞。  
夜靜每勞瞻紫氣，春深幾欲和停雲。  
豫章臺下南歸路，何日論心到夕曛。

題陳天賜載之詩後

亶亶辭家日悠悠，上國心關河題欲徧。  
雲海夢初深卷裏，英雄迹人間正始音。  
成連舟已遠，空對伯牙琴。

書韓氏八十詩卷

宋筠作序

八袞更齊年，兒孫孝且賢。  
衣冠驚乍見，今古幾能全。  
德

是耆期本家宜福祿綿國初人物在獨對宋公篇

王仲庸八十李受益隸書養志以扁其堂

大興王氏世忠厚乃祖向來醫國手活人千萬不論功  
富貴浮雲亦何有隱君八十字仲庸同牢孟光壽且同  
妻賢子孝萬事足有善可樂酒可中皇慶天子初嗣位  
賜帛高年興孝治此時二老拜恩榮新構華堂名養志  
李侯八法元蒼蒼奮筆為挽千鈞強三牲五鼎亦易得  
楣間歛見三鳳凰薄俗悠悠不堪數君家盛德天所與

聖朝望治猶渴饑敢信今人不如古羨君有子真賢孝  
澤滿鄉閭犯無校祝君壽命金石堅永與聖朝扶世道  
賀亭復都事榮親堂

勸忠懷德感恩私風木無情喜又悲五等已分茅土貴  
百年莫忘蓼莪詩但令報主存先訓更覺榮親永孝思  
遙想茫茫濟陽路棠梨千樹擁穹碑

上賜潘司農龍眠拂菻婦女圖

拂菻迢迢四萬里拂菻美人瑩秋水五代王商畫作圖

龍眠後出尤精緻手持玉鍾玉為顏前身應住補陀山  
長眉翠髮四羅列白氎覆頂黃金環女伴駢肩擁孤樹  
背把閒花調兒女一兒在膝嬌欲飛石榴可憐故不與  
涼州舞徹來西風琵琶檀板移商宮娛尊奉長各有意  
風俗雖異君臣同百年永平四海一此圖還從祕府出  
司農潘卿拜賜歸點染猶須玉堂筆天門蕩蕩萬國臣  
驛騎橫行西海濱聞道海中西女種女生長嫁拂菻人

題濟南安氏章服卷

笏滿床頭酒滿鍾家能孝友國能忠一門又見安員外  
八葉寧論漢侍中勝種葵花傾曉日深培荆樹貯春風  
江州陳氏三千口七百餘年爨養同

趙一德季潤忠孝詩

南昌趙氏子早歲遭艱虞骨肉不相保萬里為國俘釋  
縛燕趙間遂為鄭家奴蕩蕩天宇濶亶亶日月徂轉瞬  
四十年朝夕勞且劬主翁豈無恩不得齊民俱主翁父  
子沒悉力持且扶有客南昌來解后談厥初問知家中

事五內猶摧剝父兄死未葬有母八十餘再拜主母前涕泗下漣如委曲陳其情願母哀其愚主母為之悲暫許奉康娛星言整去裝策馬登長途山川日以異旬朔奄相踰日暮不留行忽已臻其廬升堂拜慈母再世得相於慟哭父兄前隣里皆歛歔生者幸少慰死者歸黃壚主恩不可忘母養不可虛黽勉與母辭復返鄭氏居主母驚且喜左右咸歡呼趙子令至前授以咫尺書汝孝通神明汝義薄天衢永為故鄉民汝去勿躊躇趙子

再拜謝洒血滿襟裾主恩一未報何用早歸歟主翁積  
忠勞封謚焉可無穹碑表墓畢逝將還故墟主翁有遺  
嗣無罪倏見誅奮身伏王庭誓死訴冤誣白日迴其光  
天道劃昭蘇豈獨全鄭門高風動皇都滔滔天下者迴  
首成榛蕪安知磊落人淪此氓隸徒飛檄下九天大字  
旌其閭郁郁文獻邦盛事映梅徐母壽涉千齡聞有駟  
馬車吾聞善必報此理天不渝我作忠孝詩永激頑懦  
夫



送傳道士

新拜天書領故山飄飄歸鶴振高翰九霄風露秋標格  
萬里雲霞玉佩環舌齒存亡真大訓精神清淨勝還丹  
由來孝敬神仙事莫遣山林有厚顏

趙際可天馬圖

天馬出西極神龍不能追目為紫電光歎作風雷飛天  
馬不常有畫中或見之見之夢寐不可得得之不用終  
何為穆王無復瑤池宴漢武秦皇不相見何當真馬生

渥注來與天子駕鼓車

趙母八十

梓潼八十趙氏母內外之孫廿又五生長兵凶老太平  
盛德沖和天所與臺中濯濯兒更賢捧觴百拜阿母前  
願將忠孝報天子桃花海上春如烟

和陶詩

秋風吹庭樹密葉潛銷落玄燕寧久翔白鴈紛南泊清  
晨得尊酒冥然還獨酌年運倏徂謝春秋焉能託依依

仰先哲緬邈空述作江漢日東流寒花繞叢薄開卷撫  
休運振衣望丘壑

葛老竹軒

開軒忘寵祿種竹作幽人霧罷清陰合霜侵粉節勻虛  
中堪體道直上似持身應有同心者移家與卜隣

早行圖

萬山迴合路紆縈獨策羸驂欸欸行却憶麻源三谷裏  
畫橋攜酒聽溪聲

寄喬達之

東魯相逢兩見秋，忽傳南牧古筠州。  
向來不負甘棠訟，此去真分黃屋憂。  
政裂多門從古患，民罹百病自今瘳。  
中朝人物如君幾，縱樂江南得久留。

豐城熊蒙衆挽詞

故國三吳暮，橋門六館秋。  
文章歸自誌，賓客拜荒丘。  
但覺風流遠，誰將歲月遒。  
青山延慶里，落日不勝愁。

壽李秋谷

薇省星辰近鑿坡日月遲上公開瑞旦舊學蔚明時玉  
琯微陽動宮壺喜氣隨已傳蕭應昂復說傳騎箕琥珀  
蒼松液珊瑚碧樹枝茂生豪傑士來作太平基憶昔公  
初起方時事已隳艱虞身保障謀議國蒼龜赤手除蛟  
虎丹心見藿葵一朝周典禮萬世漢官儀宗廟重鍾簴  
乾坤再柱維秦階寒耿耿遐壤日熙熙大小陳綱紀神  
姦鑄鼎藝桂枝增秀發蔓草極芟夷鄉校惟聞頌朝廷  
總得宜端由天子聖亦在哲人推昭代才何盛斯文柄

獨持立言成準範析理貫書詩餘事歸青史新篇藹素  
期朝趨雙闕內夕夢北山陞顧問常前席論思每執規  
力援寒暖溺已視庶民飢姓字喧童稚仁恩被等衰功  
高門似水心靜爵空縻報主期堯舜為臣志呂伊山河  
分陝地勲業太常旗早達謙盈理居多寵祿辭戰兢存  
夙夜顛顛負安危即此觀天道宜能永福綏直為天下  
祝不是老夫私

次韻秋谷西郊書事

車馬城西何處村青山綠酒鴈紛紛天開勝日晴如洗  
地轉微陽氣欲醺應倚長松詢白髮還臨絕澗望紅雲  
高賢自古間難得夾道爭瞻李相君

贈李肖岩

海內畫手如雲起寫真近說中山李一入都門天下聞  
半紙無由及田里羣公列卿日闐咽過眼得皮仍得髓  
含毫泚墨笑且談忽見威儀在屏几精神道道出眉目  
炯若寒蟾映秋水自言貌畫千萬人不獨形殊心更異

邪正惟存瞭眊間英雄多在風塵裏我聞其人未曾識  
姓名籍籍常在耳皇慶元年秋九月退食詞林方徙倚  
黃花遶屋白日寒風罷天高鴈如蟻忽從集賢趙司直  
剝啄叩門到堦記掃堂展席開清尊相對蒼然感衰齒  
京華出入四十載顧影周行若疣贅只堪杖屨老林丘  
何用形容汗鱗紙解包拂硯起盤礴落筆童奴亦驚喜  
平生傳寫盈筐篋豈有疎髯白如洗懸之素壁日相看  
從此歲寒吾與爾黃金百鎰未能報贈君肖岩兩奇字



君王思治方旰食夙夜求賢每虛己願君莫問江南北  
徧歷幽遐閱多士魚鹽版築鼓刀徒今人豈無古人比  
莫待九重勞夢寐便合圖歸獻天子

緝熙殿御題紫薇花扇面壽郝中丞

十一月廿五日

江南千里花茫茫紫薇靜對中書堂畫工會得無窮意  
一枝宛轉留芬芳緝熙殿裏日月長御筆落處蛟龍翔  
花前未覺風流遠扇底猶含雨露香烏府先生黃閣老  
高敞新齋坐霜昊聊持此畫託千年從今永伴中書考

壽白雲山人

白雲山人起西域陽春為心玉為德初從南土佐元戎  
萬里聲名已輝赫頃得雄藩展驥足武昌城裏初相識  
黃鶴秋風庾亮樓大江落日曹公壁此時最好安太守  
旦暮過從豁胸臆君為郎署向河南我欲江西老一庵  
再承天詔還京闕君已中書坐贊參萬國山河歸美化  
千年治亂入高談紫薇紅藥天光轉翠竹蒼松客夢酣  
聖明天子今軒昊敬老尊賢古來少皇恩忽先一陽回

大政仍資共探討天教初度臨長至我識仁人多壽考  
安得移家與卜隣歲晚風流成二老

禹柏圖

我昔觀風江漢域大別寺中觀古柏皮空骨立二千尺  
扣之鏗然若金石雙龍盤拏爪角怒白晝歛恐風雷黑  
小枝旁出勢蜿蜒復似遊龍顧深澤蒼蒼數葉森北向  
貞心不受螻蟻蝕我時見此獨驚怪僧言相傳禹所植  
別來夢寐常髣髴恨不圖之堂上壁安南國王住漢陽

府中好事黎侯前皇慶元年同入覲忽持墨本來相覓  
開緘蕭蕭朔風起半幅生綃萬鈞力恰如大禹疏鑿時  
天斧雷礪鬼神役自言得之寺僧手寺僧得之故侯宅  
舊本模糊鎖暗塵上有東坡手題墨臨摹欲遣天下知  
國王命我來索詩此柏會有摧朽日此卷豈有消磨時  
我聞此語坐太息神禹至今幾興衰人間老樹亦無數  
此樹應以人而奇門前馬鳴君欲歸黃河東去浮雲西  
歸語山僧謹護持莫令此柏凌空飛

次韻吳閒閒梅花

故園爛熳看花處，愛月畏風愁夜雨。  
漱芳亭上一相逢，忽似江南花下語。  
薄裁瓊靨嬌難狎，細剪冰鬚繁可數。  
却憐主人閒更閒，病眼摩挲吟欲舞。  
亦擬南城覓數株，安得萬錢買連土。

題蘇黃遺墨并序

伯杭郎中示余所藏蘇黃二帖，惓惓忠孝如見其  
心。兩翁遺墨流落天下者多矣，君獨寶此可尚已。

夫為之詩曰

兩翁心事幾人同  
二帖惓惓孝與忠  
惟有太平賢御史  
時將舒卷挹高風

送羅元發教授應昌

攜書別帝京  
王國得儒生  
路出開平遠  
雲連絕漠橫  
鳳瑤飄夕吹  
龍海夾寒城  
善教無南北  
因成萬里名

送高君尹尉氏

聞君別親故  
宰邑出王畿  
青天大梁道  
落日黃河西  
尉

氏古稱劇長材無不宜民心如蹄涔微撓即濁之但使  
各生遂豈在信嚴威撫字考寧下廉信謹所持勿謂百  
里小可為天下師宿麥日夜深農務將及時君行不可  
遲君會不可期努力樹嘉政足慰平生知

九歌圖

瀟湘南下洞庭深無力能援楚國沉縱使九歌堪入畫  
何人寫得放臣心

題雪景圖五首

竹所每徑造雪溪俄夜遊人生適意耳何去復何留  
家近長安市居然靜勝喧為言賢令尹不為雪關門  
布被冷於冰紙窓明似月推枕理殘書未肯甘汨沒  
天地玉清境郊原瑤樹林無邊詩興在只向灞橋尋  
介矣閔仲叔高哉井大椿夫君見何晚大雪不干人

舜舉梅竹折枝

吳興畫手早相知粉墨淒涼歲月移惟有寒梅并翠竹  
京華相對獨題詩



黃華老人墨迹

讀罷黃華水調歌漁蓑鶴氅奈情何溪邊梅樹湖邊石  
怪底新年入夢多

送王義父還黃陂重建河南書院

少年匹馬遊淮浦雙鳳亭前憶同譜黃陂老尉有佳兒  
伊洛沈湟接東魯黃州精舍久寂寥河南故號無今古  
江漢奔湏想源委宇宙褰開見規矩惟有中書白雲老  
幾度扁舟為凝竚思賢撫迹意無極慷慨伊誰闢榛莽

郡人好事王義父手擲千金如糞土去年赴調來京師  
解后乃與中書語願公早歸白雲下看我崢嶸抗新宇  
我有良田二百畝永與諸生共勤苦京師聞者皆嘆息  
磊落新篇慰羈旅期君努力成此志坐為江山發矇瞽  
文光夜插翼軫寒聖道春融天地溥待君業就當識之  
盛事千年照淮楚

謝西溪

君住西溪第幾灣青原白鷺思漫漫灘聲夜應書聲起

樹色朝連野色寒昔在蓬山歸是夢今汨湘水去為官  
過家誰共臨流賦試拂沙頭舊釣竿

成脩然孝感詩

世祖舊臣成太史笑人拘忌說陰陽但憐墓草臨衢路  
敢許棺花結祿祥千疊香山新改兆一枝玉樹已傳芳  
由來孝是昌隆本狐首青烏信渺茫

寄商季顯廉使

商侯守官四十年清如水壺直於弦平生知己惟霜竹

卷藏淇澳懷渭川七閩同寮許相寄日月悠悠今幾歲  
每過聊城不遇君想見珍緹鎖寒翠玉堂望望北歸鴻  
何日霜枝在眼中不是人間無處得卷舒長揖故人風  
近聞歸自西江側况復家居臨大驛也知愛竹仍愛詩  
若得吾詩當兩易

雪樓探梅圖

竹樹參差老不才四山壁立雪皚皚  
凌寒何許龍鍾老  
獨對梅花待酒來

玉荷杯壽內

曾預方平會金盤捧玉杯蓬萊幾清淺又見碧蓮開

天山胡氏春暉堂

春暉堂前蘭葉齊春暉堂後萱草肥阿兒日晏王府歸  
上堂稱觴舞僛僛兒能讀書母所教兒能為善母所導  
兒孫滿眼才且賢母恩深厚何以報天融地和日載陽  
願母壽年天地長

利翦彥祥樗亭四詠

柏龍

庭前老柏苔蘚澀拔地盤拏奮鬚鬣變化愁隨霹靂飛  
摩挲若有風雷入主人獨抱歲寒心苦節貞姿日月深  
門外黃塵三十丈何時乘此去為霖

松石

地底流脂成琥珀地上枯枝并為石皴皮剝落棟梁材  
瘦骨峻嶒風雨色根離葉盡碧枝空此心不轉與誰同  
前身不是赤松子安知獨非黃石公

太湖石

震澤波濤日夜翻  
澤中老石久都穿  
何人掇取樗亭看  
白玉圍腰下九天

春日菊

開遍幽花不待秋  
不當重九更風流  
唯應細嚼枝頭藥  
爛熳青春醉不休

真樂亭

闕右山水邦  
賈氏烟霞人  
讀書不求官  
為樂得其真  
孤

亭抗林表嘉樹藹氤氲野色雨餘遠天香風定聞見月  
為素秋逢花即芳春詩成寄遠客酒熟分比隣閒雲時  
獨留馴禽日相親一與物情遣安知賤與貧

送李宗明

賈公門下客李氏舊名家萬里辭京去孤舟背郭賒吳  
山新店雨楚樹故林花定有懷賢者逢君久嘆嗟

子昂為閒閒畫竹石作別

仙舟發御河別楮洒蒼波雙樹尊前出叢篁石上多月



明行亂影風靜倚柔柯還似看棊處尋雲入薜蘿

孤雲

渺渺從何起亭亭只自飛朝隨風鶴去暮逐雨龍歸幾  
度超滄海多應點翠微何時能借我裁作羽人衣

壽額森特穆爾知院

四月初三日

開國元勳後明公食肉飛山河雄帶礪社稷寄樞機禁  
直星辰近天光日月依因君弧矢旦梅實記初肥

白鶴歌并序

右丞李君明之性至孝弱冠時父有罪當刑君請代之暨赴刑所世祖皇帝密旨緩刑遣近侍候之君欣然就死略無不滿意馳報詔並釋之母病盲君日舐其目目乃復明已而為昭睿順聖皇后所知擢為大護國仁王寺總管寺之後方興高深大小之宜君實度之梓匠工役之勤君實董之簿書之期會錢穀之出納一無私焉迄致重門複殿金碧交輝巍巍煌煌為京師諸寶坊冠冕一日羣鶴

翔舞所居簷間人皆以為孝感所致翰林王鹿庵  
李韋軒商左山諸大老賦詩美之繼作者無慮百  
家凡數大軸皇慶二年夏余被旨撰碑文至寺與  
雪菴宗師偕來徜徉觀覽綠陰鬱然師指庭中喬  
松鉅柏曰此李君手植也今年幾八袞官且一品  
子貴孫茂而君方聰明康強日婆婆嬉遊於是間  
其人必有大過人者言未既君攜所藏瑞鶴詩卷  
出示且索余詩余既美君孝行之盛又悲卷中諸

老無復平昔乃作白鶴之歌以著余感云

白鶴來羽毳舞且鳴久徘徊白鶴非鶩雞何由致庭  
階主人孝行深可哀父當刑子代之天子哀其情父子  
得並生母方育子舐之天地哀其誠母目得復明主人  
孝行世所驚白鶴雖禽鳥豈無性與情白鶴去還復顧  
青天遙遙高且遠但願主人世世還相似白鶴長來庭  
下住

劉處士挽詞

處士真終始文康若父兄各求千載志豈為一時名花  
下琴尊在階前竹樹榮精魂渺何許日暮玉河聲

題何澄畫村田樂

番番白叟宛宛黃童飽食而嬉樂與歲同 白叟番番  
黃童宛宛今日何長舊日何短 明君在上良臣在下  
今汝樂只誰識憂者 右三章章四句

楊士允郎中將赴江西省幕出示勉庵記因題  
其後兼以贈行

高齋對時雨竹樹藹青青手披勉庵文忽念君子行君  
子今何行江右撫列城君子當世彥累世飄華纓忠貞  
所服襲孝友日光明自從列中朝海內仰清聲云何有  
遠適天意在黎氓顧惟大江南去國數日程貢賦天下  
九舟車日無停有民此有財暴本必傷生井法廢已久  
貧富始相形貧以食其力富以蓄其贏貧多富恒少相  
養乃相成俗吏守一隅上下蕩無經民心國之本可正  
不可傾願君執其綱一視使其平矧今用文治禮讓漸

可興勉哉君子政素學此足徵

題楊士允志雅堂

楊君志大雅百行繩祖武度書充棟梁列器雜今古退  
食即披玩朋來共容與書以味其道器以觀其度藏之  
貽子孫用之奉明主

題米元暉忘機圖

扁舟輕不渡斷岸斜初轉白鳥波上閒青山意中遠已  
知江湖樂還驚歲年晚海翁那有機相忘自應遣

菊圃王朋益挽詞

忠謹人皆忌剛廉性獨存  
初還淮土節又作魏城藩  
勇退中年志全歸聖主恩  
悠然堂下菊白露滿空園

封氏節婦

中山節婦人所無年二十六  
身孀居朝躬蠶繅夜辟纊  
上事尊章下憫孤自食苦淡  
奉甘腴力持門戶勤且劬  
只今春秋七十餘一生皎潔  
冰霜如堂前陰陰槐柳榆  
堂後藹藹萱花初兒衣斑斑  
白玉壺方瞳素髮紅氍毹



阿婆高節摩天衢阿孫聲名滿皇都阿婆壽命金石俱  
阿孫世世高門閭中山節婦人所無

題楊紫陽跋盧誥議詩卷

二老已青山斯文尚世間傳家欣有後開卷若承顏治  
亂何堪說乘除只等閒祇應存世德珠去自能還

南窓

綠樹陰陰鳥自啼薰風寂寂日長時客來欲問南窓意  
庭下蕭然半局棋

送司徒錫喇卜法師歸秦州

秦州法師沙羅巴前身恐是鳩摩羅讀書誦經踰五車  
洞視孔釋為一家帝聞其人徵自遐辯勇精進世莫加  
視人言言若空花我自翼善刊淫侈雄文大章爛如霞  
又如黃河發崑阿世方浩浩觀流波五護尊經鬱嘉猷  
受詔翻譯無留瑕辭深義奧極研摩功力已被恒河沙  
經成翩然妙蓮華大官寵錫真浮苴舍我竟去不可遮  
青天蕩蕩日月賒何時能來煮春茶

薜庵

瓮裏青黃碧綠卷中幼婦受辛欲為冰壺作傳酒醒雪  
夜何人

薛氏佚老園

客至自洛陽為說永寧城城南十畝園風物有餘清園  
中有高堂佚老以為名紅紫昂復低時至自敷榮迴溪  
蔭弱柳長渠泛落英好風來無期幽鳥相和鳴況有賓  
與客美酒長共傾借問主者誰闕輔舊諸生為官伊洛

中於焉委餘齡斯人骨已朽但有名與聲茲園雖未荒  
令我懷典刑幸從公子游同列在王庭題詩繼茂躅永  
言播芳馨

陳氏宗敬堂

堂前衆花發堂上春酒香上有百歲翁語笑何琅琅下  
有四世孫醉後相扶將翩翩舞且歌五綵曳朝陽祝翁  
金石壽勸翁白玉觴朝吟屋東麻暮賦池西楊富貴豈  
不榮孰若壽且康園有果與蔬田有稻與梁甘腴豈不

美稼穡不可忘古來賢達人敬仲誰敢當卜齊事已遠  
遺胤尚高唐

筆歌贈張進中

宣城諸葛無消息京師張氏雄江北張氏之筆如秋鷹  
神王骨勁隨縱橫又如囊錐乍脫穎毛生歷階楚王驚  
朝廷年年寫佛經千人萬人集佛庭張氏施筆知幾萬  
寶藏赫奕騰金英張氏施筆真施筆有口未嘗言福德  
至尊得之猶愛惜衆人區區豈常得張氏初年學劉逵

劉遠之名翻有覩始知一技足名世況乃窮年究墳典  
我行偶出鍾樓南馬前長揖求停驂坐我土床勸我酒  
不得公句終身慚學書豈但記名字用筆貴能知筆意  
莫愁世無王右軍且合相我太史氏

送武當張真人赴召祈雨南歸

聖主憂凶歲真人下碧岑雲辭武當黑雨入薊門深獨  
抱回天力常存濟物心兩宮宣賜罷歸鶴杳沉沉

張儀之餘慶堂

炎宋南遷日羣公從六龍德門張氏最戚晚主恩重國  
敗家仍破身全慶尚鍾高堂帝城裏千載元名宗

集賢直學士文學山挽詞

身是忠臣後心懸聖主朝瀛洲纔接武炎海遠乘輅敢  
謂都門別俄成楚些招青原在何許南望颯風颭

曹承旨擲雙陸得畫犬一卷索賦

四海為家天地開諸侯方物集燕臺豈惟雉自越裳至  
亦有獒從西域來依依母子舐且乳或寢或行緣復顧

區區禽獸猶如此況乃君臣并父子夜戶不閉不可忘  
犬四方無虞不可忘戰黃金千鎰壁十雙不如曹公一  
擲得老庞畫師畫此豈無意安得猛士守四方

林縣尉救火

懷寧林少府為政近來無大火中宵起驚民四面呼炎  
烟和月黑猛勢挾風驅即恐全城燬那能大屋塗朝衣  
當烈焰頭首望天衢臣職多遺闕斯人何罪辜誠深如  
見帝言訖欲忘軀倏若銀河決仍將碧海輸參差餘萬



室歡舞立千夫火本無情者君真有德歟存心皆惻隱  
何物不沾濡天地原無間豚魚尚可孚吾詩非溢美庶  
作後人摹

長江歸櫂圖

靄靄天始晴蒼蒼景將晚江波日東流遊子何時返

張弘道挽詞

辭家隨叔父結髮學飛仙短死非關命長生不在年壽  
寧增母笄心已悟真筌何意人間事猶勤聖主憐

姚文獻公汾晉水玉山和尚二詩墨跡

汾晉祠前水自流玉山老衲亦荒丘  
數行殘墨姚公帖  
霜日閒看雪滿頭

題樊川別墅

嚴家賣藥長安市種德流芳已三世  
孝思獨在神禾原  
更築樊川植蘭桂亭臺高下春風香  
神禾鬱鬱正相望  
白雲時負闌干起翠柏應參雲漢長  
終南山色年年好  
富貴榮華似秋草但能歲活千萬人  
對酒看花可終老

秋江釣月

荷蓑非避世持竿不求賞  
夙抱江海心寧為利名鞅  
天明紫烟裏日暮清波上  
四顧無人知孤舟自來往

畫兔

君王罷游獵重德不重射  
狡兔秋田中食粟得閒暇

雲雷詩

四十年前春夢裏魚龍畫起  
陸成池雲收雷罷須臾事  
正是青天白日時

題許仲仁墨跡

殘雪詞林退食時  
小窓開卷鬢如絲  
音傳正始誰同調  
氣逼元和稍自持  
文字不隨前輩盡  
風流却許後人知  
霜清日冷梅花瘦  
獨對爐熏看欲癡

壽李右丞八十

八袞康強似壯年  
平生忠孝得於天  
居隣金地心如佛  
坐對雲山興欲仙  
瑞鶴時聞賓客賦  
綵衣爭羨子孫賢  
功成名遂身先退  
久視長生自有傳

張母貞節

歌罷柏舟心欲無  
此生寧用表鄉閭  
雲中白髮張君母  
絕勝人間偉丈夫

題歸來圖

山多兮險幽  
龍騰兮虎遊  
山人去兮乘雲  
忽歸來兮躡  
浮縣厓兮木欄  
蔭蒼松兮望流  
泉流泉兮在下  
白團團兮誰宇  
岩扉兮石戶  
去不見跡兮來  
無所餐露芳兮  
月腴將子無去  
兮吾與同居

黛石山壽張宗師

蓬萊山上白雲根  
鑿得嶙峋黛色鮮  
不受神人梁碧海  
曾供媧氏補青天  
懸厓日暖生靈液  
深谷春回響細泉  
看到後天終不老  
長盛香案玉皇前

江臯雪霽圖

茫茫積雪覆四野  
一葉扁舟順流下  
不知前村雪幾深  
早有攜琴探梅者  
小橋初日暎青林  
隔岸樓臺聳玉岑  
對此杳然思郢曲  
朔風滿面獨長吟

王東泉八十二首

懸車三十載閉戶自長吟鳥語日移席花香春滿林龜  
蒙五畝宅箕穎四朝心獨往吾雖愧當時憤更深

先生今八十千歲以為期花竹年年好溪山處處宜東  
阡復南陌美酒與新詩放浪樊籠外世人那得知

送喻道士歸漢中白雲觀

秦公有揖客身著羽人衣玉井一為別白雲長自飛還  
從京國見又向漢中歸迴語故人道吾生已息機

汪忠卿御史梅庵

家住新安生虎林  
繡衣風節老梅心  
客來若問封侯事  
笑指庵前月色深

胡景清得母

三十餘年失母慈  
關山阻絕塞鴻悲  
一朝相見灤河上  
却話初逢離亂時

題元裕之贈劉濟川詩後二首

濟川齊王  
豫之孫

赫赫齊王化古墳  
還從文字識王孫  
王孫不向齊中老



目斷并州何處村

元子文章學老坡百年人物擅關河風流併逐浮雲散  
況我看詩鬢已皤

王梅叟溪山對月圖

明月照飛瀑倒瀉清溪曲溪上一株松亭中人似玉

題盧仲實歸養詩卷

昔君滁州佐戎幕棄官歸養何其樂今君調官向京國  
心雖欲養寧復得一別滁州已十年阿翁三載隔重泉

平生為養可無恨但恨無由再相見東風吹花楊柳新  
金河水暖波鱗鱗京華之樂春復春少年馬上知何人  
雪中行吟七賢圖  
長庚自是謫仙人子美逢時稷卨臣風雪茫茫五君子  
凍吟猶得望清塵

送吳思可守汀州

同袍趙濟寧夙昔說君名京國初相識閩山忽遠行分  
憂天子寄平政庶民情但使心如水平能令瘴癘清

葛推官平反

大梁秋官仁且明刑者復續死者生昔無一兒慰目前  
瓊枝玉樹今森然力田種苗苗或荒君家種德子滿堂  
子孫世世不可忘

用韻賦解安卿雙頭牡丹并序

瑞雲紅牡丹兩花并蒂詩人以為解氏子孫競爽  
之祥是矣而詩中比之麗人止是公也輒用韻反


騷

並蒂開花自一奇人鍾和氣物何私  
文華軾轍趨京日風韻機雲入洛時  
定與子孫呈上瑞肯同兒女逞多姿  
闌干穩護紅雲著實在枝頭驗我詩

送扎法經歷赴山西幕

我昔居南臺與君日相從回首三十年  
謂君已飛翬及茲復相見微名不償功  
雖蒙聖主知進退何從容好爵誰不縻  
君視如飄風寧為正直窮不為壬巧通  
歛起佐西幕激烈孝與忠別我升車行  
念我雙鬢蓬君行展高

材一聲平生胸我志在丘壑  
睠焉息微躬冥冥朝陽鳳  
夏雨生梧桐寂寂澗底松  
蒼然歲寒中勗哉君子心  
庶用存始終



雪樓集卷二十九

欽定四庫全書

集部  
雪樓集卷三十

詳校官中書臣羅錦森

侍讀臣孫球覆勘

總校官庶吉士臣朱鈐

校對官編修臣楊壽楠

謄錄監生臣王泰雲

欽定四庫全書

雪樓集卷三十

元 程文海 撰

詩

題劉將軍墨跡

芝山山前湖水春  
行人尚說劉將軍  
將軍百戰能百勝  
高興獨與烟霞親  
平生橫槊三千首  
流落知為幾人有  
殘篇忽向嗣侯看  
燕山落日天風寒

送薛玄卿

裁雲以為裳製霧以為衣朝辭赤墀下日暮歌采薇世  
味淡如水高情誰可希還持江南夢送子山中歸

白雲山八詠

白雲隱岫

靄靄天際雲還自青山起昨夜為雨歸今日青山裏

綠野芳春

平原藹初綠時鳥變芳聲還同世外客閒看齊民耕

古塔標峯



浮圖上空翠遙望是層峯落日照峯頂化為千丈龍

憨泉灌圃

流泉清且甘誰遣姓為憨搢搢抱瓮者泉頭仍結庵

楚山秋霽

坐對連峯曉悠悠楚國秋山中深幾許時約白雲遊

石人晚照

何人化為石朝朝還暮暮只見亂山晴不知石人處

崇店霜晴

霜凋棠梨樹爛爛如春花日照樹間屋晃然成絳霞

菟村夜雪

楚國但荒榛子文無故宅年年村中獵雪上於菟跡

送白雲平章歸故山

賜姓出朝班今朝始是閒恩隆光祿貴名配白雲山進  
退君臣際聲名宇宙間岩花千萬樹日夜待公還

蕭山圖

廻首江西最上遊山隨人姓尚為蕭客行天下三十載

家住溪南第幾橋日冷雲松朝漠漠月明風谷夜迢迢  
夢回枕上聽春雨記著東園長藥苗

送榮上人歸洛陽白馬寺

榮公遊上國又向洛陽歸白馬開新寺緇塵濯舊衣吟  
詩江月冷振錫野雲飛此去千餘里無令消息稀

鄧教授致仕還江東

積學今成老遺榮不待年歸心彭蠡外客思薊門前孤  
棹隨飛鳥長河合暮蟬知機誠可尚忽別獨愴然

送慧心和尚

或坐或行無不可一來一往本難期滿輪明月天如水  
正是孤舟到岸時

四駿圖

四馬同一槽同槽已蹄齧豈不愛神駿所貴還在德

題李宗師所藏李仲賓李雲庵趙子昂墨竹

李侯游戲竹三昧葉葉枝枝分向背却憶王猷徑造時  
一點清風驚百代雪庵筆力老且堅神藏氣密如枯禪

繁霜彫林雪積野虛堂宴坐方寂然最後數竿更森疎  
高節猶含老龍種一枝欲費百金求松雪道人世所重  
羨君一朝得三絕五月對之若冰雪我但從君覓竹栽  
滿植中庭貯秋月

謫仙捉月圖

牛渚磯前白錦袍蛾眉亭外月初高江波滿眼如平地  
醉倒長舟一世豪

祖生得母

二十八年南北阻三千里外死生疑一朝見母唐州地  
昨日官軍破賊時

貢士鄒國祥挽詞

開闢乾坤後浮沉吳楚間著書成白首把酒看青山  
空憶鄉書薦惟求聖代閒京華聞永已南望一長潛

長沙李主簿棄官隱居東湖孺子祠側築齋曰  
仰高寄題

一尉高安政已佳桂陽拂袖更長沙簿書期會諸君足

泉石山林兩鬢華，賴有蘇卿餘舊園。  
況依徐孺作隣家，仰高堂上琴書罷。  
自灌畦蔬種好花。

題宋復古古木寒泉

老樹倚寒泉，空山鎖翠烟。  
麻源三谷裏，白雪小樓前。  
地僻無人到，神交有畫傳。  
題詩自惆悵，何日問歸船。

李叔行成都寓居萬竹亭

岷江之西雪嶺東，蠶茨溪頭萬竹中。  
孤亭已去世人遠，高節惟應君子同。  
兄弟一家皆玉立，子孫千古更清風。

四松寂寞浣花里却笑崎嶇子美翁

李仲賓風竹橫披

平生著處惟栽竹為愛千雲度雪姿何似卷中三五箇  
閒來舒卷看參差

次韻解安卿石假山

夜騰光怪畫生輝數尺嵌岩舊見稀欲獻楚王憂肘足  
怕逢織女誤支機斜當明月偏宜照近逼紅塵不敢飛  
中慶堂中蓬島客相看不覺戀柴扉



畫馬

耳峻蹄高目有隅  
肉鬣磊砢立奚奴  
承平誰用千金買  
空使閒人畫作圖

畫牛

東華塵裏度年年  
每見春風憶故園  
曾是江南新雨過  
閒看稚子引烏犍

釣臺圖

先生只合桐江老  
幸有生涯釣與農  
偶被羊裘勾引去

客星早已不相容

桃江圖

大仰山前宿雨餘  
桃枝江口正樵漁  
何人乞得身無事  
勝買雲山小結廬

山水圖

誰能如此住相對  
兩忘情屋上青山色  
窓前流水聲

墨竹

舊篠斜依石  
新梢怒出林  
平生讀書處  
手種盡成陰

睡鳬圖

紅蓼不禁霜  
雙鳬夢正長  
世人那得似  
江海永相忘

滕王閣圖

幾度滕王閣  
凭闌看晚晴  
西山與南浦  
相送復相迎

蕭御史取稌帖圖

稌帖屋梁上  
世人那得知  
不關蕭翼點  
自是老僧癡

陀子墨跡

北去南來鬢已皤  
柳風沐雨閱人多  
謾誇編竹能除垢

奈此蕭蕭短髮何

塔海布哈孝行詩

治定功成萬化開  
遐方驚見產奇材  
養生送死如東魯  
致樂遺榮類老萊  
禮豈專為中土制  
孝元根本心來  
北堂日永萱花好  
安得千金佐壽杯

吳君載挽詞

竹罷繁霜徑蘭摧  
白露庭不堪垂老  
日頻作故人銘生  
世無中壽傳家謾  
一經最憐歸故里  
何處望儀刑

濠梁劉孝子詩

濠梁孝子劉將軍名在乾坤旌在門少年攻戰策殊勲  
衽席干戈獨好文父死寢苦仍枕土母疾減年兼剔股  
阿母孀居五十年阿兒孝行俱千古西園種李生李枝  
東園種桃桃滿蹊將軍之孝天所知世世子孫還似之  
韓滉牧牛圖

農為天下本萬世此心同晴日開圖畫方知宰相功

李氏八十詩

憶昔申公八十餘故人曾為辦安車  
太平天子思文治  
會向山中訪禮書

題龍眠二圖

孔訪萇弘

聖人何常師小技亦有道  
至今圖畫中若聽文王操

曹楊讀碑

以彼禍賊深遇此智識淺  
道旁十六字方爾較近遠

夏可軒挽詞

身分栖雲壑名誰動玉墀神仙付兒子詩禮自吾師瀛  
館徒云貴山翁元不知清風蓬島在何用緋謳為

范氏貞節

海內傳貞節誰如范母賢八旬壽者相五十寡居年門  
有名王表家多勝士篇里閭增嘆羨詩禮見曾玄

王氏節婦

鄆城王氏孝且慈年未三十身孀居上有姑章下二雛  
仰事俯育何勤劬二雛已長姑章沒四十餘年心玉雪

二雛食祿母亦亡天地茫茫眼垂血大兒棄官守墳墓  
小兒奉檄還當去一家孝友誰能似王氏世世還如此  
題劉武敏公整子墀學臣字說後

衣冠儀羽立丹宸百辟師師學蓋臣獨羨世家家訓在  
清風千載鎮如新

王生大字筆

王生袖有筆如椽早自通州道者傳笑我蒼蒼頭已白  
不關太極寫雲烟



壽李右丞八十一歲

富貴康強八十餘當階上馬不須扶已知忠孝千年壽  
況復升平一事無案上楞伽閒每讀杯中醺醪醉仍呼  
雲山滿眼春如海爭羨朱顏照白鬚

安氏積善堂

大同有安氏積善人皆聞食比黔敖敬粟無秦晉分遺  
金且不愛負券常對焚止酒猶好客居肆仍尚文雲霞  
映高誼蘭桂延清芬天道苟可憑有報寧非君農人力

畱畝繼之還在勤

雲中四老圖

白髮雲中老衣冠有古風  
婆娑松竹裏莫是採芝翁

樂廷玉西村

南土信云美西村還是家  
侵尋新歲月夢寐舊桑麻  
汶泗青山遠荆吳白日斜  
政成聊自樂繞屋種名花

畫兔

足撲速眼迷離嬌兒宛頸  
雌雄隨安知擣藥明月裏  
夜

夜天寒月如水

李澤節義詩

母知柏舟誓兒知麥舟惠節義萃一家慈孝非二致天  
書爛爛照里門李氏之德難具論母壽八千為秋春兒  
身富貴及子孫老夫作頌天應聞

劉氏濟美堂

燕山有德門孝義子傳孫家誦同居樂人懷必報恩酒  
香花氣合琴靜樹陰繁濟美堂中客無忘劉氏言

春江小景

翠柳紅桃春滿天  
鴛鴦鷓鴣亂平川  
東風閱遍閒花草  
惟有人無再少年

訪友松竹居圖

流水青山淨似苔  
竹松多處有樓臺  
只愁寒夜來相訪  
雪擁重門喚不開

周文矩畫高僧試筆圖

南康遺墨紹興題  
京國傳看白髮時  
一片古屏秋似水

山僧把筆未曾知

白鶴圖

昂昂十八鶴云是宣和寫長鳴月滿皋四顧天垂野相  
從上寥廓三嘆非仙者

周介夫稽中堂

紛綸接構勞反覆枯亡患伊人炯獨立高堂啟清晏四  
壁惟詩書前榮或賓饌時從退食際發此喟然歎前瞻  
慮已遠却顧懼猶緩暗室儼有臨春水凜將泮冥求天

下本歎見古人面清風日正高明月夜方半持之應萬物至理何由畔

題趙子昂畫羅司徒家雙頭牡丹並蒂芍藥

並蒂連枝花亂開冲和元自主人培集賢學士春風筆更寫天香入卷來

葉處士挽詞

君在山中住青山深復深泉聲傍戶細樹色過牆陰接竹惟澆藥看松亦抱琴如今無復見空有夜猿吟

送戴道士住天台

君承恩命住天台萬壑千峯繞絳臺門外霞川浮溟滓  
杯中雲海接蓬萊時同野鶴看桃去或領山猿採藥迴  
三十年前吾亦到舊題應入白雲堆

題召秀才孟陽處士詩卷

孟陽處士入京師身著山中舊補衣坐對王侯常極論  
行逢水石忽如歸韓康賣藥逃名姓陶令休官覺是非  
何似行藏隨所遇無心處處可忘機

題趙敬甫先德詩

君不見趙侍御大父昔宰元城日惠政旁洽四海聞身  
死百姓負土葬至今猶號縣家墳又不見趙侍御祖母  
袁氏遭亂離獨抱前母之子棄已兒孤兒哀哀草間啼  
寇盜滿眼若不知兩兒俱全天與之豈知孤兒孫絕類  
更離羣出入耳目股肱地吸為凜秋噓為春一朝天子  
賜恩寵白日赫赫懸高旻上公大國及祖父漏泉之澤  
無涯津乃知為善必有報當時未必求報如今人嗟哉



侍御何以報永以忠孝書諸紳

朱陵別館圖

悠悠清川動靄靄朱陵曉宿霧猶空濛行雲方縹緲谷  
深嘯陰虎峯高礙晴鳥應有仙人來巢居謝塵擾

何澄馬

畫馬非真馬猶擅千金價南山猛虎多安得馳之射

宋學士所藏五馬圖

朝飲幽并暮秣吳龍膺鳳脊紫方臚承平得此寧無用

可惜人間只畫圖

李仲賓為劉明遠畫竹

李公畫竹真天成疎枝密幹皆有情偶然縱筆作長幅  
颯颯坐覺聞風聲古松偃蹇連蒼柏怪石崔巍如積鐵  
李公心事劉子知歲晚相期飽霜雪

王氏貞節

李家孀婦王家女翠柏為心未云苦故廬蕩盡起新廬  
子為縣官女有夫一生孝敬無與比德被親嫌照閭里

紛紛薄俗安可論  
幾人玉雪懷終始

重送戴道士并序

余既作霞川詩送戴君提點其所稱述翰林從事  
邵生為余言如此後數日太常博士虞伯生來言  
君所適者越也非天台所謂霞川乃在桃源蓋用  
以自號者請更賦

被命將居越扁舟指會稽  
海雲迎棹起江月照人低  
有道蟠龍虎無生混鷺雞  
霞川隨處是何必武陵溪

一初

一從何處起初自幾時名昨夜山中夢梅花雪乍晴

南陽太守射虎圖

一箭何妨一害除使星歸進兩玄珠欲知太守忠勤事  
請看南陽射虎圖

題晉寧申氏家慶圖

申家盛德映當時家慶圖中始見之盡出素金援滯獄  
潛輸囊米濟隣飢已驚賢婦能齊壽復見名郎有七兒

最是舍旁羈旅者感恩猶自說流離

右軍帖吾有七  
兒一女皆同生

題吳閒閒擬剡圖

和風翼輕舟平碕蔭嘉樹依依流芳在渺渺層波去未  
知圖畫情稍叶滄浪趣真人與道息宇宙隨所寓季真  
亦已遠陳迹寧足慕環樞本無方矧有濟勝具何許川  
上亭政在會心處

劉恩州挽詞

籍籍甘陵守依依白下民甘棠初蔽日宰樹已經春昆

寵家留譜壘黃代有人須知清白吏名德久逾新

李伯時馬

龍眠畫馬真是馬一疋猶當萬金價參差粉墨見龍媒  
渴飲長江柳陰下我今老病無所求但願早賜歸林丘  
肩輿飽飯百不憂間看稚子騎犂牛

折枝桃榴圖二首

長眉添粉重媚臉醉春暄百轉東風裏如何獨不言  
西國移根早瑤池染露新青禽舊相識來送鳳城春

謝安對奕圖

晉代衣冠不可尋  
空餘畫史筆間心  
東山絲竹西州淚  
却是羊曇恨最深

郭熙小景

一路秋光百里溪  
行人行急趣前期  
船頭別有鳴琴客  
仰面青天信所之

雪晴圖

沙際風迴雪乍晴  
偶然雙鴈下青冥  
山禽共嚮木居士

不見靈芝一朵生

夏珪山水

隱者多依泉石間  
結廬相對共幽閒  
誰知泉石更多事  
日夜鬪聲來撼山

趙大年小景

足馬衝寒踏落花  
杏園深處曲江涯  
何如相對風軒坐  
喚得漁船傍酒家

賜歸後讀趙間間遂初園八詠



得閒已羨閒閒早得去何妨去去遲偶讀先生遂初賦  
於今不愧八篇詩

韓滉田家移居圖

韓公豈獨丹青妙出入周旋足令猷坐擁荆吳兵百萬  
不忘田舍有漂流

饒陽葛文元嘗題詩真定趙定國臨碧亭西壁  
上重來則穿壁之竹覆之矣為賦一絕

臨碧亭中題壁處重來花鳥總無言惟餘亭下青青竹

透壁穿墉護墨痕

樂府

漢宮春 壽劉中齋尚書

記得年時向爛柯山上問訊山君神仙當日機杼付與  
何人猿驚鶴怨道烟雲久暗楸紋祇有箇留侯好在玉  
梁千尺崢嶸老子當筵國手曾看書賭墅決策推枰  
而今長垂衫袖卷却機心後先翻覆一從他局面虧成  
旁觀者不求他訣只從乞與長生

喜遷鶯 壽大人

四月七日

天南天北記歲歲今朝白雲凝目遙想羣仙擗麟作脯  
鶴馭丹霞三谷此日癡兒多牽引領諸孫盈屋齊綵服  
對綠陰紅子緩斟醺醖和睦保吾門一家詩禮箇是  
生籙官不在高名何必大無用滿堂金玉但願太平無  
事日用莫非天祿從今去看壽如磐石鬢鬚長綠

酹江月 寄壽京山宣慰叔

歲時荆楚渺淮海相望竹林清逸挂了笏冠歸去也側

耳中郎消息見說旌旗行春江上也報歸來日嬋娟千  
里如今猶共天北應是南國甘棠綠陰新長未放春  
風歇料得清香凝燕寢兵衛森然畫戟回首塵蹤轉蓬  
未了又欲馳京陌浩歌金縷殷勤遙寄銅狄

木蘭花慢 壽忠齋

三月廿七日

春光明媚日萬紅紫鬪芳菲算幾許韶華脂銷粉褪蝶  
懶蜂稀誰如半山解道道綠陰幽草勝花時天與誕生  
元老壽延長占佳期功名富貴轉頭非滋味總曾知

且鸞坡鳳掖文章議論玉珮瓊琚癡兒那知許事須安  
排名字作去聲公師豈識遼東歸鶴只今壽國元龜

臨江仙

壽崔中丞

四月十日

永日綠陰庭院靜最憐紫燕翩翩舊巢已墮不堪黏主  
翁情愛重親手捲朱簾恰則五龍同浴佛松高又報  
生賢殷勤深意倩誰傳呢喃如對語富貴出長年

又有序

四月廿五日

予生之辰先養蒙學士旬日亦既拜臨江仙曲之

賜謹次韻為養蒙壽且賀新除

卷起黃庭聽壽曲蒙齋可賀綿綿安排機會實闢天生  
辰今日是新命此時傳宣室曾聞前席語偉哉龍象  
初筵斜飛取勢玉堂仙太平遲公等大拜定今年

養蒙詞附

臨江仙曲仰為座主雪樓相公先生壽

前幕下士張伯淳頓首再拜

白雪樓頭清晝永新來喜事連綿朱明綠暗麥秋天

繡衣何日去丹荔已香傳  
前夜團團明月好清光  
留照華筵錦囊隨處地行仙  
庭椿闕望眼同慶八千  
年

青玉案

壽趙方塘學士

五月五日

昌陽初薦長生醕又好日逢重五  
綠鬢神仙家玉署每  
年今日綵鸞齊駕排日歡初度  
今年天上恩榮異道  
壽也還他富細葛香羅難比數  
醺醺醉了卿卿一笑巧  
結同心縷

沁園春 并序

五峯大卿寄示所和繡江參議沁園春詞一以  
退為高一以進為忠二者皆是也區區愧未之能  
焉倚歌而和情見乎辭

十載京華騎馬聽雞自憐闊疎看春風葵麥敷舒如此  
故園桃李憔悴知歟要乞閒身聊追故步雪艇烟蓑一  
釣夫君恩重却許令便養欲去躊躇竹西準擬寧  
居詠不到娉娉嫋嫋餘又橋邊巷口燕尋舊壘天東海



角月上新衙戶素有慚澄清無補豈不懷歸畏簡書堪  
時用得卿如卿法吾自吾廬

金縷歌 壽大人

新月溶青荔望天邊壽星一點白雲千里又是吾翁初  
度日兩見童顏十四多絳縣老人一歲想得姑仙麟脯  
宴進蟠桃滿引霞杯醉羣玉樹可人意 癡兒未了公  
家事喜此中堂名繡綵晨昏如侍著箇斑衣渾欲舞却  
把壽卮遙跪祝翁壽三山一似已潔清香凝寢處奉安

車弭節徐徐至就祿養看孫戲

沁園春

和王寅夫樓居妙曲兼致惜別意

天上仙人只愛樓居真成故常自五雲深處乘風冉冉  
三神山畔弭節陽陽醉裏乾坤閒中歲月興到謝家春  
草塘凭高望看塵間萬事翻覆蒼黃好留此意要荒想  
坡老風流肯獨當況日邊紅杏空迷蝶夢眼前綠樹嬌  
嚬鶯簧明媚時光溫柔地氣尚可栖遲老是鄉花神訴  
怨春歸閨苑自有天香

清平樂

以茗芽撥扇壽長樂尉弟

四月三日

潮來潮往百里遙相望喜見卯君初揆度好寄海南拄  
杖蕭然四壁坡翁要求黃木無從受用一般苦味奉  
揚千載清風

品令

壽譚公植提學

九月十日

黃花的皪更著意粧秋色三神山外九仙峯頂輝騰奎  
壁聚遠樓高人在青雲千尺輕車劣削度窈窕穿丹  
碧翠橙香沁玉醪春艷笑摩銅狄數點梅花已報調羹

消息

滿庭芳 壽曾勁節

天地為爐，崑岡欲燼，此君興味何長。  
深林蒼雪，特地作清涼。  
甲刃縱橫陣裏，翠旌纛佩玉鳴璫。  
須知道，生來有節，晚歲更昂藏。  
詩人閒品藻，似衛公九十淇水徜徉。  
任風花高下，蝶亂蜂狂，有客長途苦暘。  
貪美蔭欲買陂塘，推門去，何妨枕藉三萬六千場。

青玉案 壽趙定宇

梅花盃酒年年早有箇詩人未老恰則蛾眉新月巧人  
間春信水邊仙影共約今宵到 少年回首都休道算  
只有紅泉快幽抱贏得池塘閒夢草堂開二樂客添一  
笑長似梅花好

金縷歌 壽胡澗泉憲僉 二月七日

八桂歸來後又十年泉紅澗碧蟠桃春曉老子精神真  
滿腹合借福星當道怎長寄東臯舒嘯是則顛狂人渴  
想奈一川風月多情好攀琪樹拾瑤草 耆英洛社尊

胡杲問何當棕鞋桐帽率先九老歲月天長留石磴此  
約他時須早定分我香山歌笑未論桑田滄海事比諸  
公他日猶年少政恐有鋒車到

摸魚兒 壽燕五峯右丞

記江梅向來輕別相逢今又平楚東風小試南枝暖早  
已千林烟雨春幾許向五老仙家移下瓊瑤樹溪橋驛  
路更月曉堤沙霜清野水踈影自容與 平生事幾度  
令章殿宇隔花么鳳能語苔枝天矯蒼龍瘦誰把冰鬚

細數千萬縷簇一點芳心待與和羹去移宮換羽且度  
曲傳觴主人花下今日慶初度

五峯詞附

繡使雪樓先生歌摸魚詞華余初度次韻敬  
謝盛心荒唐愧甚

又浮生平年六十登樓悵望荆楚出山寸草成何事  
閒却竹烟松雨空自許早搖落江潭一似琅琊樹蒼  
蒼天路謾伏檻心長銜圖翅短歲晏欲誰與梅花

賦飛墮高寒玉宇剛腸還寧馨語英雄操與君侯耳  
過眼羣兒誰數霜鬢縷祗夢聽枝頭翡翠催歸去清  
觴飛羽且細酌肝泉酣歌郢雪風致美無度

水龍吟 次韻謝五峯

不知今夕何年飛來五老峯頭月清輝無限殷勤回照  
歲寒蒼雪寫入宮商鋪成紈素盡情誇說倚胡床老矣  
若為消得除却是杯中物 自笑半生長客正沉思故  
林幽樾兒童驚走龍鸞雜遝兩山排闥風雨蕭蕭冰霜



耿耿相看高節問此君學和龍吟水底幾時成闕

漁家傲 次韻謝郭西楚僉事

出世自憐居佛後眼前萬境真何有曲調最新情却舊  
重湖右林宗一筴同攜手西楚有雲初出岫浮空肯  
學纖絺須信此中無雨久君識否老夫只羨無官守  
摸魚兒 次韻盧疎齋憲使題歲寒亭

問疎齋湘中朱鳳何如江上鸚鵡波寒木落人千里客  
裏與誰同住茅屋趣吾自愛吾亭更愛參天樹勞君為

賦渺雪鴈南飛雲濤東下歲晏欲何處  
踈齋老意氣  
經文緯武平生握手相許江南江北尋芳路共看碧雲  
來去黃鵲舉記我度秦淮君正臨清句  
宣城水名歌聲緩與  
怕徑竹能醒庭花起舞驚散夜來雨

踈亭詞附

樂府摸魚子奉題雪樓先生鄂憲公館歲寒  
亭詩卷

為君歌歲寒亭子無煩洲畔鸚鵡江山勝槩風霜地

要近魯東家住丘壑趣應素愛昂霄老柏孤松樹登  
高作賦想白雪陽春碧雲日暮別有倚樓處 金閨  
彥尚憶西清接武年來喬木如許團茅時復羲皇上  
我醉欲眠卿去歌欲舉還自悟君亭琢就瓊瑤句疎  
齋試與倩倚竹佳人湘絃赴節涼滿北窻雨

大德辛丑五月廿二日書於長沙肅政公  
宇之澄清堂涿郡盧摯頓首再拜

感皇恩 次韻姚牧庵題歲寒亭

翠節下天來通明誰侍地有高齋要名士相逢恨晚老  
矣酒兵詩帥歲寒同一笑千年事黃鶴霸情暮雲離  
思半掬心香火初熾梅花滿樹又是一年冬至政相思  
恰有江南使

牧庵詞附

捧讀雪樓憲使歲寒亭記擊節之餘扳踈齋  
例亦賦樂章姚鑑再拜

尋丈歲寒亭何多環侍烟節雲旂萬青士旄頭鐵甲

更兩蒼官為帥落成天雨雪皆奇事 不獨玄冬偏  
生幽思六月清風失炎熾三年轉燭君去豈無人至  
惟應無坐嘯文章使

臨江仙 以鴛鴦梅一盆壽程靜山平章

千歲蒼虬成玉樹江南江北孤芳平生何處最聞香五  
更江上路幾度月中霜 休笑梅兄今老大年年青子  
雙雙風流消得喚鴛鴦和羹真箇也莫忘水雲鄉

清平樂 壽王楚山

楚山清曉借問春多少松菊深深香縹緲  
萱朶蘭芽交照 丹霞洞口紅泉從來慣醉飛仙不是稱觴獨後後天  
長似先天

臨江仙 餞拜都御史

海北天南千萬里繡衣霄漢乘驄飛來黃鶴喜相逢清  
霜鸚鵡月寒食牡丹風 仙闕曉班催玉筍馬蹄還上  
春空江頭官柳得春濃不如江漢水萬折與俱東

點絳脣 送王蓋臣

綠鬢青雲王郎故是乘驄侶阿龍風度想在烏衣住  
帶得春來又共春歸去江頭路美人何處官柳吹風絮

又送王世英

執法星邊從前合着雙星佐近來漆箇轉覺光明大  
到得長干想見鶯花過情無那王郎知麼喚起思歸我

摸魚兒 次韻謝張古愚

漢江東舊家文獻風流意氣相許金臺早集荆山鳳聲  
振一庭鷓鴣春幾處須信道甘棠樹樹含清露平湖古

步妙一曲釣天魚龍出聽未數應鍾呂 吾衰矣鬢點  
吳霜幾縷劉郎忘却前度千年黃鶴歸來晚山色謾留  
眉翠東北注羨衮衮雲濤去接西江水仙塵異趣但極  
目朝陽清光萬里阿閣送高翥

鷓鴣天 壽郝仲明御史

庚暑初消酷吏更秋風新動仕途清生辰長占中元是  
今歲欣逢二美并 冠獬豸掌銓衡鏡般明了水般平  
手中一卷山翁啟人道延生北斗經



蝶戀花 壽齊諾監司十二月朔

黃鶴山前梅半吐，歲歲年年誰是水霜侶。自有使君來共住，黃昏不怕風吹雨。見說和羹天已許，帶得春來又怕將春去。記取澄清堂上語，八千眉壽從今數。

南鄉子 壽程靜山

報道杏梢紅，又報新添老令公。好箇平章風月手，成功畫戟金釵，各幾重。七十未為翁。彭祖當時小角童。家慶圖中須着我，吾宗歲歲年年壽酒濃。

浣溪沙 題湘水行吟

風雪交加凍不醒  
抱琴誰共訪湘靈  
數峯全似故鄉青  
流水落花何處路  
綠陰幽草可憐生  
行人小待我同行

滿江紅 送陳正善繡使將指江閩

楚甸春濃早重染  
甘棠舊綠天  
又念海深江闊  
達聰明  
目漢使只今應遣  
十周官  
自古須廉六美  
繡衣遥映袞衣明  
人如玉  
論別恨猶未足  
還怕見征車  
速待相隨

千里試騎黃鵠無奈江山分去住漫教風雪欺松竹問  
使君如肯酌紅泉尋三谷

掃花遊 寄贈西楚赴臺都事

別離況味嘆自古難禁最關情處暮簾捲雨念征衣乍  
拂故人良苦見說麻姑也怕方平節斧正凝竚又報道  
待回天上官府誰與傳尺素想玉簡頻催綵雲難駐  
中臺獨步便迤邐金門近連沙路野鶴江樓為囑仙翁記  
取耿無語倚山亭黯然平楚

摸魚兒 次韻謝張古愚

又山亭一番春老歸遲黃鶴何許殷勤天上乘槎客還  
記渚鷗沙鷺憔悴處奈青鏡難藏一一都呈露空庭細  
步念一笑三年相思千里他日看嵇呂 西門柳烟雨  
千條萬縷入誇張緒風度誰知聳壑昂霄意春樹漫搖  
柔翠杯滿注願回壽松喬一曲清如水壺中得趣問日  
麗扶桑風來闔闔應許共遐翫

浪淘沙 次疎齋韻題楊生卷

城上望宸樓夢裏神遊山無重數水悠悠惟有江西楊  
處士來往扁舟金鳳落河洲君試回頭呢喃檣燕替  
誰留誰道明年如斗大借問沙鷗

點絳脣 壽王楚山

幾日春寒楚鄉山色偏濃秀雪前雲後相對青如舊

洞府沉沉聞道花開又烘晴晝蟠桃結就共慶千年壽

木蘭花慢 壽胡澗泉

耆英圖書裏笙鶴擁地行仙是曾識舊家南宮禮樂餅

餞春筵海南早迎駟轡凜霜威風度肅蠻烟笑引霓旌  
絳節歸尋碧澗紅泉軒然過却古稀年窻戶濕壺天  
甚小車花外醉呼麟脯滿泛金船蒲輪晝榮相錦福蒼  
生此筆健如椽辦了調元勲業丹霞小住千年

浪淘沙 壽譚梅屋

瀟灑水雲鄉樂事難忘鳳書無奈又相將遶屋江梅猶  
未白簡上飛霜小住政何妨院院秋香今朝何處按  
伊涼一曲一盃千萬意地久天長

海棠春 壽胡澗泉

年年二月風光好佛出世有誰知道無量壽如來昨夜  
先來報 澗邊玉樹泉邊瑤草千歲和春未老莫羨澗  
泉間有鳳啣書到

六么令 壽聰山

海鶴松間襟韻梅花雪後精神皇家著蔡老元臣曩常  
千載事品物四時春 人道聰山毓秀秀如嵩岳生申  
壽身壽國壽斯文三階明紫極一氣轉洪鈞

臨江仙 壽晉軒

久矣君家無此客年年天際遙瞻文星明侶半規蟾蜍  
廳風細細蓮燭夜懨懨尚記當年飛鶴譜重隨賀燕  
呢喃逢迎一笑捲疎簾花開春未減日永酒頻添

蝶戀花 壽陳北山

月掛新年弓未彀壁水溶溶已覺春光透國子先生松  
竹友一尊請為斯文壽況是雪中萱樹茂華萼相輝  
天長地久何處東風吹雅奏孔堂絲竹千花晝



又 戲疎齋怡雲詞後

長憶山中雲共住出處無心只恨雲無語今日能歌還  
解舞不堪持寄山中侶 誰道解愁愁更聚自有卿卿  
慣畫雙眉嫵問取慳風并澁雨相逢認得怡雲否

菩薩蠻 次韻郭安道探梅

孤根自是春憐惜一苞生意何曾息南北本同枝先開  
先得詩 風來元不約冷暖憑斟酌花落又花開年年  
去復來

千秋歲 壽劉中庵

報梅開處又報君初度  
冰雪種瓊瑤樹重逢仍嫵媚  
方發非遲暮春滿面  
廣平消得平生賦  
觀裏桃應妬無耐  
風霜返香不斷清如許  
從教吹笛裂自有和羹具  
花會否明年相見沙堤路

天仙子 壽杜左丞

一自壽星臨杜曲  
歲歲小春春意熟  
泰階相向更分明  
調玉燭扶鈞軸  
突兀眼前惟此屋  
折得歲寒枝上玉

擬祝翠尊還覺俗何如繡綵在庭前看未足杯方續周  
魯後前光汗竹

太常引 壽高麗王

沁園歲歲菊留芳待此日慶真王金鼎燮和元造壽域  
同開八荒 帶河山礪一傳千歲地久與天長晴日上  
扶桑便先照瑤階玉觴

鵲橋仙 次中庵韻題解安卿盆梅

南枝春盛斜斜整整猶帶孤山光景相逢索笑耐尊空

向老瓦盆中自省 風霜人老關河路永賴得生成慣  
冷憑誰移傍太初岩待雪月交光對影

中庵有奇石  
號太初岩

臨江仙 壽尹留守

六月灤陽天似水月弓初上新絃一篇來壽我同年帝  
京賢牧守人世妙神仙 年甲偶同人却別我今早已  
華顛羨君福祿正如川印韋金磊磊階樹玉娟娟

清平樂

西楚使君自遼左寄詩詞至灤陽猥承見及

次韻代訊且謝不忘

新來酒戶想勝看花處  
帶得春行平壤路同笑同歌同  
住  
灤陽却近山家芒鞋夜夜丹霞流水落花歸思蒼  
烟白石生涯

太常引 壽李丞相

雪消一半鳳城春  
杏桃小帕嚴辰獨有柏屏蒼翠便似  
南華大椿  
露濃天近玉魚金印恩共歲時新  
多少太平民願真箇朝堂秉鈞

碧桃春 壽廣微天師

琵琶峰上曉雲光  
遙聞薇露香雲中  
王母九霞觴  
碧桃今日嘗  
開大國佩重章  
舊家張子房  
青山虎踞復龍驤  
梅花江路長

沁園春 壽李秋谷平章

十一月朔

河漢無雲淡月疎  
星王宇初澄漸  
金仙掌上露華高潔  
西風陣裏霜氣峻  
嶺浪蘊浮花狂  
茨怪蔓此日紛紛一  
掃平誰歟似有天公  
錫號秋谷山人  
須知與物為春

向擎斂中間寓至仁是紱麟盛旦黃鐘應候一陽方動  
萬彙俱萌億兆蒼生鈞陶繫命壽國端如壽此身梅花  
遠倩新詞描寫來侑芳尊

玉樓春 次韻王彥博右丞詠梅

梁園賦客情無奈嚼到梅花和蠟愛偏憐初日透宮黃  
怕染春風成野黛 遊蜂怪底隨飛蓋揀得繁枝償酒  
債玉堂開卷已春殘紅紫紛紛都異態

清平樂 壽李秋谷

葱葱瑞色峯蔚亭前客一點梅花藏太極總是春風消  
息 去年今日西山哦詩賭酒忘還到底黃扉紫閣不  
如未老清閒

天仙子 壽白雲平章

玉漏遲遲高閣報枝上梅花春又透紅雲宮闕白雲山  
人盡道如君少江北江南行處好 試聽陽春歌楚調  
調鼎勲名都做了人生七十古來稀仁且壽誰能有  
酒滿斟南極老





雪樓集卷三十

欽定四庫全書

雪樓集附錄

元史本傳

程鉅夫名文海避武宗廟諱以字行其先自徽州徙郢州京山後家建昌叔父飛卿仕宋通判建昌世祖時以城降鉅夫入為質子授宣武將軍管軍千戶他日召見問賈似道何如人鉅夫條對甚悉帝說給筆札書之乃書二十餘幅以進帝大奇之因問今居何官以千戶對

帝謂近臣曰朕觀此人相貌已應貴顯及聽其言論誠聰明有識人也可置之翰林丞相和爾郭斯傳旨至翰林以其年少奏為應奉翰林文字帝曰自今國家政事得失及朝臣邪正宜皆為朕言之鉅夫頓首謝曰臣本疏遠之臣蒙陛下知遇敢不竭力以報尋進翰林修撰屢遷集賢直學士兼祕書少監至元十九年奏陳五事一曰取會江南仕籍二曰通南北之選三曰立考功歷四曰置貪贓籍五曰給江南官吏俸朝廷多采行之賜

地京師安貞門以築居室二十年加翰林集賢直學士  
同領會同館事二十三年見帝首陳興建國學乞遣使  
江南搜訪遺逸御史臺按察司並宜叅用南北之人帝  
嘉納之二十四年立尚書省詔以為叅知政事鉅夫固  
辭又命為御史中丞臺臣言鉅夫南人且年少帝大怒  
曰汝未用南人何以知南人不可用自今省部臺院必  
參用南人遂以鉅夫仍為集賢直學士拜侍御史行御  
史臺事奉詔求賢於江南初詔令皆用蒙古字帝特命

以漢字書之帝素聞趙孟邁葉李名鉅夫當臨行帝密諭必致此二人鉅夫又薦趙孟頫余恁萬一鶚張伯淳胡夢魁曾晞顏孔洙曾冲子凌時中包鑄等二十餘人帝皆擢置臺憲及文學之職還朝陳民間利病五事拜集賢學士仍還行臺二十六年時相僧格專政法令苛急四方騷動鉅夫入朝上疏曰臣聞天子之職莫大於擇相宰相之職莫大於進賢苟不以進賢為急而惟以殖貨為心非為上為德為下為民之意也昔漢文帝以

決獄及錢穀問丞相周勃勃不能對陳平進曰陛下問決獄責廷尉問錢穀責治粟內史宰相上理陰陽下遂萬物之宜外鎮撫四夷內親附百姓觀其所言可謂知宰相之職矣今權姦用事立尚書省鈎考錢穀以剝害生民為務所委任者率皆貪饕徼利之人江南盜賊竊發良有以也臣竊以為宜清尚書之政損行省之權罷言利之官行恤民之事於國為便僧格大怒羈留京師不遣奏請殺之凡六奏帝皆不許鉅夫既還行臺二十

九年又召鉅夫與胡祇通姚燧王惲雷膺陳天祥楊恭  
懿高凝陳儼趙居信十人赴闕賜對三十年出為福建  
閩海道肅政廉訪使興學明教吏民甚畏愛之大德四  
年遷江南湖北道肅政廉訪使至官首治行省平章家  
奴為民害者上下肅然八年召拜翰林學士商議中書  
省事十年以亢旱暴風星變鉅夫應詔陳弭災之策其  
目有五曰敬天曰尊祖曰清心曰持體曰更化帝皆然  
之雲南省臣言世祖親平雲南民願刻石點蒼山以紀



功德詔鉅夫撰其文十一年拜山南江北道肅政廉訪使復留為翰林學士至大元年修成宗實錄二年召至上都三年復拜山南江北道肅政廉訪使四年與李謙尚文等十六人同赴闕賜對便殿拜瀾東海右道肅政廉訪使復留為翰林學士承旨皇慶元年修武宗實錄二年旱鉅夫應詔陳桑林六事忤時宰意明日帝遣近臣賜上尊勞之曰中書集議惟卿言甚當後臨事其極言之於是詔鉅夫偕平章政事李孟參知政事許師敬

議行貢舉法鉅夫建言經學當祖程頤朱熹傳註文章  
宜革唐宋宿弊命鉅夫草詔行之三年以病乞骸骨歸  
田里不允命尚醫給藥官其子大本郊祀署令以便侍  
養時令近臣撫視且勞之曰卿世祖舊臣惟忠惟貞其  
勉加餐粥少留京師以副朕心鉅夫請去益堅持授光  
祿大夫賜上尊命廷臣以下飲餞於齊化門外給驛南  
還勅行省及有司常加存問居三年而卒年七十泰定  
二年贈大司徒柱國追封楚國公謚文憲

年譜

諸孫世京編錄

公諱文海字鉅夫避武宗皇帝御名以字行程氏之先自成周之世伯符始國於程至伯休父佐宣王中興忠誠君嬰保晉趙文子忠佑公元譚西晉守廣平移節新安忠壯公靈銑佐命于陳代著忠績世居歙縣之黃墩復遷于休寧縣之閔川口宋元豐中有曰處士巽者於公為七世祖巽生緒緒生仁勝皆以經學教授潛德弗耀高祖徵士諱宥興性仁厚有大略樂善好施嘗遊漢上

樂其風土卜築郢州京山縣之西高渠上薦辟不起卒  
葬其地曾祖安僖公諱子明沈靜方嚴寡言笑重然諾  
天兵破襄漢避地于郢時沿邊流寓者凡數千人悉為  
經理之使各得其所卒葬壽昌之槲林村皇贈集賢侍  
讀學士中奉大夫護軍追封楚郡公祖簡懿公諱德秀  
魁岸有器幹復東入彭蠡寓隆興新建縣之吳城山從  
之者數百家沿江閫帥檄委糾合鄉井以自護遂結豪  
傑料丁壯利器積糧掘壕樹柵以為固外兵莫犯民咸

德之初以季子登朝恩封承務郎復以功擢壽春府軍  
事判官主管淮西安撫使司機宜文字晚以宣義郎致  
仕卒葬吳城之吳林皇贈資善大夫中書左丞上護軍  
追封楚郡公三子長累贈光祿大夫大司徒柱國楚國  
孝肅公諱翔卿次同知荆湖北道宣慰使司事巖卿次  
翰林侍讀學士兼國子祭酒飛卿公簡懿公母弟宋逸  
士德萃子也襁褓來後大宗孝肅公以為嗣孝肅公資  
性明敏練達事情持家御衆斬斬有法椿憲壽考叔季

宦成孝友之著焉公幼有異質恢廓不羣承學父師及長卓有成立德祐乙亥季父侍讀公通判建昌攝守事公侍諸父奉太母太夫人就養未幾天兵南下建昌內附侍讀公受命為守遂舉家居焉公不能忘郢故取郢之白雪樓以名所寓而後學因稱雪樓先生後賜地築室京師又扁其齋曰遠故又曰遠齋先生云

宋淳祐九年巳酉

夏四月十七日戊午午時公生于吳城山

寶祐元年癸丑

公五歲入小學讀書即通大義父師初命名曰慤  
之後字周翰

景定元年庚申

是年元中統元年

公年十二歲 是年天兵渡江公侍大父母避兵  
于海浦兵退歸吳城從仲父宣慰公受業對客賦  
詩作文應聲而成人服其敏

三年壬戌

公年十四歲 是年季父侍讀公登進士第省試  
三場文公一覽成誦聞者驚異

咸淳元年乙丑

是年元至元二年

公年十七歲初從學于龍淵胡自明先生明年往  
就學胡氏家塾

三年丁卯

公年十九歲游臨川讀書臨汝書院受學于族祖  
徽菴先生若庸與翰林學士吳文正公澂為同門



歲菴乃饒雙峯先生高第弟子有字義行世

六年庚午

公年二十二歲赴湖北省試及歸道經壽昌過白  
狐嶺謁獅泉李先生珏見公所答策文驚曰三篇  
皆欲為國家措置大事他日必非常人有司迄不  
敢取

八年壬申

公年二十四歲初贅于臨川嘉祿徐氏廣胖居士

寔發女也

德祐元年乙亥

公年二十七歲 是年侍讀公參制置司事于洪  
公從之居講學東湖之上侍讀公尋拜郡建昌公  
侍諸父奉太夫人就養冬十二月天兵南下建昌  
內附

大元至元十三年丙子

公年二十八歲始更名文海字鉅夫 是年春公

從侍讀公入覲世祖皇帝于上京授公宣武將軍  
銀牌管軍千戶

十四年丁丑

夏六月子大年生

十五年戊寅

公年三十歲 是年春公挈家入備宿衛冬十一月  
九日上召見香殿問卿在江南知賈似道為何如  
人公條對似道始終所以忠邪狀上大說給紙札

命悉書其詞敷奏稱旨特命改直翰林俾從諸老  
游

十六年巳卯

夏六月授應奉翰林文字朝列大夫

十七年庚辰

冬十一月進翰林修撰

十八年辛巳

公年三十三歲 春正月陞中順大夫祕書少監

冬十二月遷集賢直學士中議大夫兼秘書少監  
十九年壬午

夏六月公建言吏治五事一曰取會江南仕籍二  
曰通南北之選三曰置考功歷四曰置貪贓籍五  
曰給江南官吏俸祿朝廷皆采行之是年有旨  
賜地十畝于安貞門灞河之西樂道里俾築居室  
公作遠齋于室南有齋記詩文

二十年癸未

公年三十五歲 春三月加翰林集賢直學士同  
領會同館事

二十一年甲申

冬十一月四日夫人徐氏卒年三十七後追封楚

國夫人

二十二年乙酉

是年夫人俞氏來歸宋昭孝太妃女弟也

二十三年丙戌

公年三十八歲 春正月改集賢直學士進階少  
中大夫 三月公入見陳乞興建國學遣使江南  
搜訪遺逸御史臺按察司並宜參用南士上即命  
建國子監詔公仍本官拜嘉議大夫侍御史行御  
史臺事賈漢字詔書乘驛求賢江南夏四月公至  
行臺視事承詔禮遣葉李趙孟邁赴闕公遂遍歷  
諸郡廣求賢俊

二十四年丁亥

春公率所薦趙孟頫張伯淳等二十餘人赴闕復命上皆擢以文學風憲清要之職公復奏陳民間利病五事夏四月特拜集賢學士仍還行臺

二十五年戊子

夏四月子大光生

二十六年己丑

公年四十一歲夏四月子大本生時首相僧格專政法令苛急四方騷動公乘傳入朝奏疏劾



之僧格怒凡六奏請害公上皆不允命臺臣館公  
俟命

二十七年庚寅

春有旨還公行臺未幾大臣交劾僧格如公所言  
明年僧格伏誅

二十八年辛卯

夏五月子大來生

二十九年壬辰

夏五月召公及姚燧陳天祥等十老臣赴闕賜對  
勞問甚悉

三十年癸巳

公年四十五歲 秋七月拜正議大夫福建閩海  
道肅政廉訪使 冬十二月至福州視事興學明  
教吏民甚畏愛之

大德元年丁酉

公年四十九歲 春二月子大觀生 冬閩海代

歸

四年庚子

公年五十二歲 春二月拜江南湖北道肅政廉  
訪使 秋閏八月至武昌視事首治行省平章家  
奴之為民害者上下肅然 冬作歲寒亭于署後  
有詩文題詠一卷

五年辛丑

公重建南陽書院幼嘗游習其處有自作記文

七年癸卯

公年五十五歲 湖北連年大祲公以公田祿入  
悉賑貧病之不能存者惠濟甚衆 是年冬代歸

八年甲辰

公年五十六歲 是年秋公築室盱江城西麻源  
第三谷建閣藏書數千卷扁曰程氏山房復作三  
賢祠于左祠孝肅宣慰侍讀三公其地即晉人所  
謂華子岡者有自作藏室銘并陵陽牟巖記文臨

川鄭松圖誌 冬十一月召拜翰林學士知制誥  
同修國史

九年乙巳

夏六月加商議中書省事專使驛召赴闕 秋八  
月公拜命作晉錫堂于家吳文正公記之 冬至

京師

十年丙午

春公奉旨撰世祖平雲南碑文成賜其省臣伊蘇

岱爾刻石點蒼山 夏亢旱暴風星變公應詔集  
議致灾弭灾其目有五曰敬天曰尊祖曰清心曰  
持體曰更化

十一年丁未

公年五十九歲 冬十月拜山南江北道肅政廉  
訪使 十一月武宗即位素熟公名留為翰林學  
士知制誥同修國史商議中書省事特加正奉大  
夫公避御名以字行

至大元年戊申

公年六十歲 是年公奉詔修成宗實錄撰追尊  
順宗謚冊文成 秋特制贈父翔卿正奉大夫叅  
知政事郢國公謚孝肅母李氏郢國夫人仍授長  
子大年承事郎同知南豐州事

二年巳酉

夏五月驛召公偕平章何瑋左丞劉正等赴上京  
議政令尋命公奉使湖廣行省銓廣海吏選冬

竣事移疾歸

三年庚戌

秋九月復拜山南江北道肅政廉訪使

四年辛亥

公年六十二歲 春二月仁宗即位分遣詔使召

老臣尚文蕭輿等十六人赴闕公與焉 夏四月

賜對便殿 六月授湖東海右肅政廉訪使 秋

九月拜翰林學士承旨資善大夫知制誥兼修國



史

皇慶元年壬子

公年六十四歲 是年春公奉詔修武宗實錄成  
詔陞翰林院位從一品有謝表及進三朝實錄表  
冬十一月進公榮祿大夫

二年癸丑

春三月上立中官命公撰玉冊文成 夏六月旱  
廷臣集議公獨舉成湯桑林六事自責為可行時

宰不說上特遣近侍賜上尊勞公 秋詔偕平章  
李孟參政許師敬議行貢舉法議定上命公草詔  
行之撰國學先聖廟碑文成

延祐二年乙卯

公年六十七歲 春奉詔撰加上皇太后尊號冊  
文成勅待詔畫公像儒臣製贊以賜 是年公得  
末疾尋愈

三年丙辰

公年六十八歲 春疾復作公上章乞骸骨歸田  
里上不許命尚醫給藥近臣勉強特授中子大本  
承事郎郊祀署令俾侍公疾 夏得請南還特加  
光祿大夫降制追榮三代贈官錫謚賜上尊儷錦  
命廷臣祖餞大本乘驛侍行諭行省有司問安否  
勿令致仕 秋九月公過吳城山告祠祖父母修  
葺壠墓長子大年任行省檢校官謁告侍養 冬  
十月公至盱江

四年丁巳

初上嘗勅平章韓國公李孟賜程氏世德碑文成  
傳至盱江至是公力疾拜命戒諸子宜盡忠孝以  
成報國之志仍令大本還京供職

五年戊午

公年七十 春三月十五日丙子楚國夫人俞氏  
卒年五十八 秋七月十八日丙子亥時公薨於  
正寢

六年己未

春正月庚申諸子奉二樞安厝于南城縣可封鄉  
繞堆大磐山治命也 秋門人應奉翰林文字揭  
傒斯狀公行業上于太史氏

泰定元年甲子

集賢大學士王約言于朝請加公封謚事下太常  
定議博士柳貫撰謚議上聞

二年乙丑

秋七月制贈光祿大夫大司徒柱國追封楚國公  
謚文憲

至正十八年戊戌

監察御史王彛等言故贈大司徒程鉅夫累朝簡  
注中外具瞻為時名臣為國元老宜錫功臣之號  
并賜神道之碑以備褒崇以彰激勸

十九年己亥

夏四月甲子丞相太平傳旨中書命參議兼經筵

官危素撰神道碑文集賢待制趙雍書丹同知太常禮儀院事周伯琦篆額文成以賜公孫翰林應奉世京仍勅行省守臣樹碑墓道

公生丁時艱刻意勵學以研精性理為務幾二十餘年已而運遭革命入事世皇寵遇優渥出入禁闥獻替輸忠一以撫安羣黎為第一義建言興建國學搜訪遺逸臺憲參用南北之人科目取經明行修之士敷陳利病讜議時政摧抑權姦責弭災變上皆嘉納之故能出膺

澄清之寄入居謀謨之職立綱陳紀為時名臣始終一  
節表表愈偉累朝眷遇迥出等倫混一以來朔南之士  
一人而已其立身行已經綸大節太史氏既已書之公  
所著玉堂類藁九卷奏議一卷詩文三十五卷先正亦  
已序述詳備矣不肖孫復撫取歲月大槩次為年譜綴  
於文集之前俾讀者開卷有所考觀立言君子毋誚其  
僭踰可也至正二十有七年丁未春二月望諸孫世京  
百拜謹述





雪樓集年譜